

Evening Dogri (NSD) Bulletin 06-07-2024

आकाशवाणी

खास खबरां...

1 संसद दा बजट सत्र 22 जुलाई थमां 12 अगस्त तोड़ी चलोग, केन्द्री बजट 23 जुलाई गी पेश कीतार जाग।

2 उपराष्ट्रपति जगदीप धनखड़ होरें आखेआ जे नोजवानें दा जज्बा, जनून ते वचनबद्धता देश गी विकसित राष्ट्र दी बक्खी अगड़ा करोग।

3 सरकार अगले 5एं ब'रें च प्राथमिक राई-बाई दोहार-कर्जे सरबंधी सोसायटियां, 2 लक्ख ग्राम पंचायतां स्थापित करोग-आखेआ केन्द्री गृहमंत्री अमित शाह होरें।

4 सुधारक पेजस्कियान होरें कट्टरपंथी जलीली गी मात देइयै ईरान च राष्ट्रपति चुनां जित्ती लैता ऐ, प्रधानमंत्री नरेन्द्र मोदी होरें नमें चुने दे राष्ट्रपति होरें गी दित्ती मुबारकबाद।

5 भारत ते जिम्बावे बश्कार चला'रदे 5 मैचें दी श्रृंखला अंतर्राष्ट्रीय क्रिकेट मैच च पैहले मैच च अज्ज जिम्बावे नै 20 ओवरें च 115 रंज बनाए। भारत दी बल्लबाजी जारी ऐ।

<><><><><><>

Parliament Budget

संसद दा बजट इजलास इस म्हीने दी 22 तरीक थमां शुरू होग। संसदीय कार्यमंत्री किरें रिजिजू होरें इक सोशल मीडिया पोस्ट च आखेआ जे बजट सत्र 12 अगस्त तगर चलोग। उनें आखेआ जे केन्द्री बजट 2024-25 लोकसभा च 23 जुलाई गी पेश कीता जाग। श्री रिजिजू होरें आखेआ जे राष्ट्रपति द्रौपदी मुर्मू होरें बजट इजलास तांई दौनें सदनें दा सत्र सद्दने दे प्रस्ताह दी केन्द्र सरकारै दी सिफारश गी मंजूरी देई दित्ती ऐ।



Vice President

उपराष्ट्रपति जगदीप धनखड़ होरें आखेआ ऐ जे देसै दा भविक्ख नोजवानें कन्ने तैह होंदा ऐ ते नोजवानें दा जोश ते वचनबद्धता देसै गी इक विकसित राष्ट्र दी सोच बक्खी लेई जाग। उनें गलाया जे देसै च युवाएं दे तरक्की बाद्धे आस्तै बेहतर माहौल ऐ ते ओह अपनी मर्जी ते हुनर गी विकसित करी सकदे न। उपराष्ट्रपति अज्ज केरल दे तिरुवंतपुरम च भारतीय अंतरिक्ष विज्ञान ते टैक्नालोजी संस्थान दे 12में स्नातक समारोह गी संबोधत करा'रदे हे। श्री धनखड़ होरें आखेआ जे देस विकास करा करदा ऐ ते अंतर्राष्ट्रीय मुद्रा कोष सनें विश्व बैंक जनेह वैश्विक संगठन इस गल्ला गी मन्नी चुके दे न। उनें आखेआ जे समूलची दुनिया दे देसे भारत दिएं अंतरिक्ष उपलब्धिएं गी मानता दित्ती ऐ ते जंदा ब'रा साढे अंतरिक्ष मिशन लेई बेहतर रेआ ऐ। श्री धनखड़ होरें अंतरिक्ष क्षेत्र गी नमिएं उंचाइएं पर लेई जाने आस्तै इसरो दिएं कोश्टें दी सराहना कीती। श्री धनखड़ होरें इस कार्यक्रम च शीर्ष अंक हासल करने आलें गी सुन्ने दे तगमे भेंट कीते। इसरो अध्यक्ष ते आईआईएसटी भारती अंतरिक्ष विज्ञान ते टैक्नालोजी अध्यक्ष एस.सोमनाथ, आईआईएसटी निदेशक डॉ. उन्नीकृष्णन होर इस कार्यक्रम च शामिल हे। उपराष्ट्रपति होर जेह्ड़े गै केरल दे 2 दिनें दे दौपर न, हुंदा सुआगत राज्यपाल आरीफ मोहम्मद खान होरें तिरुवंतपुरम च बड़ी गर्मजोशी कन्ने कीता। उंदे कन्ने मुख्मन्त्री पीनाराई विजायन ते दुए अधिकारी मजूद हे। उपराष्ट्रपति होर कल नमीं दिल्ली परतोआ करदे न।



PM-HM Syama Prasad

प्रधानमंत्री नरेन्द्र मोदी ते गृहमंत्री अमित शाह होरें भारतीय जनसंघ दे संस्थापक डॉ. श्यामा प्रसाद मुखर्जी हुंदी जयंति दे मौके पर श्रद्धाजंलि भेंट कीती ऐ। इक

सोशल मीडिया पोस्ट च प्रधानमंत्री होरें आखेआ जे डॉ. श्यामा प्रसाद मुखर्जी होरें निग्गर राष्ट्रवाद दे बचारें आले भारत दा मान बधाया ऐ। उनें आखेआ जे मातृभूमि लेई उंदा समर्थन भाव ते त्याग देश वासिएं गी सदा—सदा लेई प्रेरत करदा रौहग। तोआई गृहमंत्री अमित शाह होरें इस मौके पर डॉ. श्यामा प्रसाद मुखर्जी होरें गी श्रद्धांजलि भेंट करदे होई आखेआ जे उनें जनसंघ दी स्थापना दे कन्नै देश गी सोचने दा विकल्प प्रदान कीता। ओह लम्मे समें तगर “राष्ट्र प्रेम” यानि राष्ट्र हित गी सब्बने शा उप्पर रखने आली सोच दी बत्तै पर टुरने लेई सब्बने दे मार्गदर्शक बने दे रौहगन।

<><><><><><>

PM-UK

प्रधानमंत्री नरेन्द्र मोदी होरें बरतानिया दे नमें चुनोए दे कीर स्टार्मर होरें गी ममारकबाद दितती ऐ। इक सोशल मीडिया पोस्ट च मोदी होरें आखेआ जे दौनें पक्ख व्यापक रणनीतिक सांझेदारी ते दौनें देशों ते दुनिया दे विकास, खुशहाली आस्तै शैल आर्थिक रिश्ते मजबूत करने लेई वचनबद्ध न।

<><><><><><>

Amit Shah

केन्द्र गृहमंत्री अमित शाह होरें आखेआ ऐ जे सरकार अगले पंज बरे च तकरीबन दो लक्ख गां पंचैतें च बहुउद्देशिय प्राथमिक कृषि दोआर—कर्जे सरबन्धी सोसायटी पैक्स दी स्थापना करोग। इनें पैक्स दा स्थापना उनें गां पंचैतें च कीती जाग जेड़ियां अजे तोड़ी सहकारिता क्षेत्र थमां बाहर न। श्री शाह होरें एह घोशणा अज्ज 102में अंतर्राष्ट्रीय सहकारिता दिवस दे मौके पर गांधी नगर दे महात्मा मंदर च लगे दे सहकार कन्ने समृद्धि कार्यक्रम दरान कीती। सहकारी क्षेत्र दे सशक्तिकरण लेई केन्द्र सरकार दिएं नेकें पैहलकदमिएं बारे गल्ल करदे होई श्री शाह होरें समितिएं गी होर बी व्यवहारिक बनाने आस्तै सहकारी नेटवर्क दे

विस्तार पर जोर पाया। कार्यक्रम दरान नैशनल को-परेटिव आरगैनिक्स लिमिटेड दे भारत आरगैनिक्स टाटा दा बी उद्घाटन कीता गेआ। इस मौके पर केन्द्री सहकारिता राज्यमंत्री मुरलीधर मोहोल ते सरबन्धत क्षेत्र दियां मंत्री मन्नी परमन्नी दियां मजूद हियां। इस मौके गृहमंत्री होरें नैनो यूरियादी खरीद पर करसानें लेई गुजरात सरकारै दी टकोहदी मदाद योजना बी शुरू कीती। श्री शाह होरें दिल्ली च अमूल दे पैहले आरगैनिक्स स्टोर वर्चुअल ढंगै नै उद्घाटन कीता। गुजरात दे मुख्मन्त्री भूपेन्द्र पटेल होरें प्राथमिक सहकारी समितिएं गी मजबूत करने ते सहकारी क्षेत्र च टैक्नालोजी दे इस्तेमाल गी बढ़ावा देने लेई केन्द्र सरकार दिएं कोश्टें दी सराहना कीती।

<><><><><><><>

Iran Elections

ईरान च सुधारवादी लीडर ते साबका सेहत मंत्री मसूद पेजस्कियान होरें गी राष्ट्रपति चुनां च जित्त हासल होई ऐ। उनें कट्टरपंथी नेता सईद जलीली गी हराया। दुए गेड़ दे मतदान च पेजस्कियान गी 3 करोड़ वोटें चा 1 करोड़ 63 लक्ख वोट थ्होए। ईरान दे 14में राष्ट्रपति दे चुनां लेई दुए गेड़ दा मतदान कल होआ हा, जेहदे च 50 फीसद शा बद्ध वोटरें हिस्सा लैता। पैहले दौर च ईरान च 1979 दे इस्लामिक क्रांति मगरा रिकार्ड सब्बने शा बद्ध मतदान होआ हा। चुनां प्रचार दरान पेजस्कियान होरें समूलची दुनिया लेई ईरान दे भित्त खोलने ते बंदशा हटाने दे कन्नै अर्थबवस्था च सुधार लेई पच्छम देसें कन्नै परमाणु समझौता करने दा बाद्धा कीता हा, जिसलै के जलीली होरें कट्टरपंथी बचारधारा गी अगगै लेई जाने ते रूस ते चीन कन्नै ईरान दे सरबन्धें गी मजबूत करने दी गल्ल कीती ही।

तोआई प्रधानमंत्री नरेन्द्र मोदी होरें ईरान दे नमें चुनोए दे राष्ट्रपति मसूद पेजस्कियान होरें गी शुभकामना दित्तियां न। श्री मोदी होरें इक सोशल मीडिया पोस्ट च आखेआ जे भारत-ईरान ते इलाके दे लोकें दी भलाई बेह्तरी आस्तै

दपक्खी सरबंधे गी होर बी मजबूत बनाने आस्तै ओ श्री पेजस्क्रियान हुंदे कन्ने कम्म करने लेई अगड़ा दिक्खा'रदे न।

<><><><><><>

Health Ministry NEET

सेहत मंत्रालय नै साफ कीता ऐ जे नीट अंडर ग्रेजुएट दी काउंसलिंग अगड़ा पाए जाने दी खबर सच नेई ऐ की जे इस सरबंधै च अजें तरीक दी अधिसूचना जारी नेई कीती गई ऐ। नीट-यूजी काउंसलिंग स्थगित कीते जाने दे सरबंधे च मीडिया दिएं खबरें बश्कार सेहत मंत्रालय नै एह स्पष्टीकरण दित्ता ऐ।

<><><><><><>

Eve Gujrat Rahul Gandhi

कांग्रेस दे वरिष्ठ नेता राहुल गांधी होरें अहमदाबाद च गुजरात राज्य दे कांग्रेस कार्यकर्ताएं गी संबोधत कीता ते भरोसा जताया जे कांग्रेस पार्टी अगले चुनाएं च बीजेपी गी हराग। गांधी होरें जेहड़े के गुजरात दे 1 ध्याड़े दे दौर पर न, गुजरात च होए दे हादसे दे शकार होए दे परोआर कन्नै मिले जेहदे च राजकोट गेम जोन च अगग लगने दी त्रासदी दे शकार दे परोआर जन बी शामिल हे। साढ़े संवाददाता नै दस्सेआ जे गुजरात प्रदेश कांग्रेस कमेटी दे दफतर बाहर बीजेपी ते कांग्रेस कार्यकर्ताएं बश्कार होई दी झड़फ दे किश दिने मगरा राहुल गांधी होरें गुजरात दा दौरा लाया। उस झड़फ दा कारण कथित तौर पर लोकसभा च गांधी हुंदी हिंदू विरोधी टिप्पणी दस्सेआ गेआ हा।

<><><><><><>

Amarnath Yatra

रातभर बरी दी बड़ी मती बरखा करियै श्री अमरनाथें जी दी सलाना यात्रा एहतियात दे तौरा पर रोक़ी दितती गई ऐ। पहलगाम ते बालटाल दौनें रस्तेआं यात्रा आरजी तौरा पर बंद ऐ। उआं खीरी रिपोर्ट औने तगर हैलीकाप्टर सेवा जारी ही। 4000 शा बद्ध यात्री रिवायती पहलगाम रस्ते पर नुनवान अधार शिविर च डटे दे न। जेकर कल बडलै मोसम च सुधार होग ते यात्रुएं गी श्री अमरनाथें जी दी दे दर्शनें आस्तै पवित्र गुफा बक्खी अगड़ी यात्रा दी खुल्ल दित्ती जाग।

<><><><><><>

Cricket

भारत ते जिम्बावे बश्कार 5 टी-20 क्रिकेट मैचें दी श्रृंखला दा पैहला मैच अज्ज हरारे च खेड्डेआ जा करदा ऐ। रोहित शर्मा, विराट कोहली ते रविन्द्र जडेजा दे टी-20 मैचें थमां सन्यास लैने परैत भारत दा एह पैहला टी-20 मैच ऐ। पिछले म्हीने वैस्टइंडीज़ च विश्व कप जित्तने मगरा भारतीय टीम दे वरिष्ठ खडारिएं गी अराम दित्ता गेदा ऐ। तोआई टॉस जित्तने परैत भारत नै पैहले गेंदबाजी करने दा फैसला लैता। जिम्बावे नै पैहले बल्लेबाजी करदे होई तैह 20एं ओवरें च 9 विकटें दे नुकसान पर 115 रंज बनाए न ते भारत गी जित्त लेई 116 रंजें दा लक्ष्य दित्ता ऐ।

<><><><><><>

Registration

भारती शेयर बजार लगातार उंचाइयां छूआ'रदा ऐ। इस ब'रे जून च 42 लक्ख कोला मते नमें डीमैट खाते खुल्ले। सैंट्रल डिपास्ट्री सर्विस ते नैशन सिक्यूरिटी डिपास्ट्री दे आंकड़े मताबक जून च खोले गेदे डीमैट खातें दी गिनतरी 42.4 लक्ख कोल रेई। एह फरवरी 2024 दे मगरा डीमैट खाते खुलने दी सब्बने शा मती दर ऐ। मई म्हीने च 36 लक्ख ते इक ब'रे पैहले यानि जून 2023 च 23.6

लकख डीमैट खाते खुल्ले हे। एह चौथी बारी ऐ जिसलै नमें डीमैट खातें दी गिनतरी 40 लकख शा पार पुज्जी गई ऐ। एहदे शा पैहले दिसम्बर 2023, जनवरी 2024 ते फरवरी 2024 च बी इस्सै चाल्ली दा बाद्धा दिक्खेआ गेआ हा।

<><><><><><>